

度

支

奏

議

度支奏議目錄

雲南司二卷

題覆總漕李待問從新整飭漕糧疏

題覆臨德二倉未完倉糧改充遼餉疏

覆總督倉場南少司徒條議倉庾儲積疏

覆餉院錢士貴題議設法剝運漕糧疏

題覆漕院京糧量改通倉疏

題覆指揮祁天祐經歷劉岱互訐疏

覆安福鄉紳請分洒帶運疏

剝糧事竣叙錄在事各官疏

覆總漕漕院查叅擅截運弁疏

漕運凍阻可虞沿途催儻宜亟疏

題差監兌主事丁自勸等疏

議放十月官軍月糧疏

覆主事陳振豪條議漕運疏

度支奏議卷之二

太子少保戶部尚書淄青畢自嚴視草

題覆總漕李待問從新整飭漕糧疏

題爲敬遵從新整飭之

明旨以振漕事之積玩事雲南清吏司案呈崇禎元年十二月二十七日奉本部送戶科抄出總漕部院李待問題稱前事等因奉

聖旨舊制糧船三月過淮今遲至九月安得不凍阻明歲過淮該部酌量回空開兌時日定限一期使

分別勸懲有據及出江日期各省具疏奏報該部
卽與覆行欽此欽遵抄出到部送司查得總漕部

院疏

請酌定糧船回空開兌過淮及各省出江日期事于
通漕呈堂移咨督部總漕酌議去後今奉本部
送准總督倉場本部右侍郎南居益咨稱隨行
京通二廳會議前來本部謬加叅酌爲照開倉
開兌過淮原有題准

欽限不如期者降罰有差後來法久玩生兼之阻妖

阻凍阻截積漸至今遲漕莫挽而要之有司催
徵不力開兌失期兼旗軍坐守行糧耽延時日
種種弊端尤屬根本之蠹致運官乘機逗遛過
淮日期年遲一年卽 功令在懸公然違背莫
可究詰矣今總漕部院議以七月過淮爲限使
一年早得兩月三四年便可漸復

舊制自是確宜救敝之術但恐過淮之後北河遇淺
遇溜轉盼冬寒仍遭凍阻今值開河在卽除一
應回空船隻悉聽漕院押催南下而先期募船

抵江接濟前此業有成議是在各省糧道躬率
有司刻期懲兌寧米候船毋船候米限于三月
內盡數兌完六月終盡數過淮如有違玩指名
叅罰單議具在 明旨森然惟力行

祖法有罰無赦一年之後庶可復舊矣至於出江一
疏凡有糧省分各糧道應將出江日期開報總
漕部院聽其分別遲速彙疏奏

聞亦稽核勤惰之捷法也若夫河南山東糧米例不
過淮今年稍速來年便可依期似不必另爲酌

定也合行咨覆煩爲再加查議裁奪等因又奉
本部送准總漕部院咨稱查得漕事積玩非一
日矣自違妖發難之後而遲益甚今太倉艮一
歲之積

聖明厪宵旰之憂本部院身肩漕事中夜徬徨誠念
年來愆期已甚在囧空之時已踰限之時單限
總屬相蒙而過淮題敘糧沿有薦舉之人無查
叅之人議單竟成故事久矣夫三月之不靈也
故謬擬一權宜之法爲責成之嚴藉

新令束人心奉

欽限挽積習以此示一示信猶勝于泛泛乎言申飭
言叅罰眇無着落耳小疏專爲過淮而言蓋過
淮船隻俱從本衙門查覆發幫法無游移而議
單內有重運過淮之日漕運衙門一體舉劾之
文貴無屑越故立的于此使人人勉而思赴非
不知政體屑瑟法度紛紜而仍守舊聞何裨釐
飭計不得不急于此其彙叅之法疏中業已備
詳所酌議者官之職事與漕糧月日分數耳道

以所屬各府之糧爲分數府以所屬各州縣之糧爲分數州縣以一州一縣之糧爲分數卽如限某月爲期能先期幾月過淮者紀錄其後期以十分爲率遲幾分者罰俸若干月幾分者加罰若干月幾分者調幾分者降做貴部查叅京邊之例酌輕重而行之而州縣藉口於兌早行遲則又以糧道揭報爲據而以過淮先後之序合之至糧道過淮本部院又面與查明殿最自確其運糧把總及領單官俱照文職事例一體

處分該道及管糧官責無他委爲法受叅其何容辭而推官向小疏責成已奉

欽依然論本等職事與該道及糧官亦自有間或舉知府遞減一分務使事有程期法無寬假人心儆惕之處卽漕事振起之處行之下年只更限期不更叅法本部院每年于報回空疏附請

欽限逐年僨上復漕規之限而止或于倉漕有當也等因各到部送司查得議單一欸內開每年漕糧俱限十月開倉十二月終完兌開幫如十一

月終有司無糧軍衛無船督糧司道及府州縣
掌印管糧官并領運把總指揮千百戶各罰俸
半年過正月者各罰俸一年過二月者各降二
級布政司掌印官降一級三月終不過淮者督
押司道等官及領運把總以下各降一級四月
終不過洪者一體叅究遵行在卷今督部與總
漕各議屬前來相應具覆案呈到部該臣等看
得漕事積玩相仍至九月方始過淮凍阻數多
敝壞已極總漕部臣議以七月過淮爲期每年

儻早兩箇月使三四年以後便可以復舊制是
法行以漸令人可以漸就速又責成糧道有司
等官各照職業事事緊湊務照京邊查叅事例
一律繩之蓋不得已而立法以峻無非欲警積
玩以收後效其心亦良苦矣乃總督部臣所議
則以遲漕之故皆因有司催徵不力開兌失期
旗軍坐守行糧耽延時日是在各省糧道躬率
有司刻期徵兌寧米候船毋船候米此誠對症
之論今值河開在邇四空卽可押催南下限于

三月內盡數兌完六月終盡數過添如有違玩者俱照單例降罰有差惟推官應比例知府遞減一等其先期早完者紀錄優敘行之一年可以復舊若限七月過淮恐北河遇淺遇溜轉盼冬寒仍遭凍阻又覺不便其有糧省分糧道各將出江日期開報總漕彙疏奏

聞以省煩費

宸聽又以稽核各官勤惰亦便計也至於山東河南無過淮之險今歲稍速來歲便可依期此議尤

爲直截乃臣因是而更有說焉重運之遲非盡
催徵不力開兌愆期也旗軍非盡坐守行糧航
延時日也蓋緣起脚地方容其多載土宜不遵
議卑節制如湖廣之板木江西之磁器浙直之
酒米蘇松之段疋各隨方物令客載已數倍于
漕米惟重則沿途貿易與夫過關撞磕及晚泊
船處不留火巷易生盜心兼之一二無根外水
呼朋引類致漏致火致盜致換皆繇於此若惡
其重也中途強之卸則又假作賽神在僻處作

戲以便營運若不容候價又矢名重營利補折
之心而易騰怨謗之口蓋初地任德則中途誰
肯任怨及其回空也但遇北地產鹽產果處所
卽賤買大包而以食米食豆覆于其面領運官
陸路先回分運官誰能彈壓卽問回空數目亦
絕口不應問有應者數目亦多不確甚之覓一
二權有刀者坐中艙鳴金張蓋令人不敢過而
問焉如此往回俱遲漕事安得不危此後非邀
明旨將各船尾從兌完時便照幫牌寫所載石數并

官旗姓名幫次來則不過六十石土宜之外則着令該總根查一物不載止足食用庶幾挽遲爲速猶可爲也總漕所謂不必泛泛言申飭言參罰意正如此相應覆

請申飭今歲回空雖遲計期亦只在三四月俱限閏四月終卽將漕米兌完限六月終卽行過准而北如違玩者各官俱照單例降罰有差能早完者分別紀錄而尤于起脚屬土宜之禁回空明鬻販之罰委官督押三尺凜然則覆轍頓更改

弦可望其於總漕大臣振起積玩之心亦庶幾其無負矣恭候

命下臣部移咨總漕督部都察院轉行倉漕御史及各該省直撫按一體振刷遵行

崇禎二年二月二十九日具

題三月初二日奉

聖旨漕船稽遲致悞糧運這過淮既定六月須二月盡數回空方可四月完兌還嚴行督催其降罰紀錄各官彙奏出江日期併禁罰旗軍等事俱依擬

申飭前有旨剝運糧數五日一報凍解已久何尚
未報着巡倉御史自行查奏欽此

題覆臨德二倉未完倉糧改充遼餉疏

題爲關寧餉缺無措臨德積欠宜清祈

勅撫按將本倉接年已徵未解額銀清數起解以濟

燃眉事雲南清吏司案呈案查崇禎元年十月

內該工科給事中劉安行題前事內稱臣前任

河南嵩縣登封查得河南額徵臨德二倉糧一

十八萬餘石每石定價八錢自縣徵完起解本

府轉發糧官糴買本色臨清交兌以補京運不

足此舊例也推之河南一省及山東槩可知矣

後因各糧官見米價騰貴苦於糴買上納遂有寢閣侵費於民無拖欠之實於倉有虛欠之名臣不敢逆定其數大約可得數十萬若稽查已往積欠暫行改折朝夕即可起解以濟軍餉一時急需并將臣前疏內所議出納全書上緊彙造等因奉

聖旨道河南山東二省應解臨德二倉糧米限該省撫按一月內備查歷年欠解及額折銀數清冊報部仍嚴催各糧官將原領銀兩速繳布政司轉解

新餉庫充本年閔寧缺餉以後額糧仍徵本色其
年終以管收除在清數奏繳通行在外各倉遵守
出納全書遴選心計司官彙造亦便省覽着卽議
行該部知道欽此移咨該撫按遵行去後十二月
十九日奉本部送據監督臨清倉主事鄭廷楫
呈稱積貯關係匪輕新舊

功令宜飭專職叨差臨庾目擊積逋催納不前已
經呈請申飭蒙移咨撫院照會藩司并劄行職
亟加督催遵奉在案嗣閱邸報見工科劉安行

疏將臨德二倉歷年積欠領銀在糧官未解者
折價解新餉庫隨奉

俞旨限該省撫按一月內繳報職捧誦躍舞深幸

聖明軫念關寧且積蠹後設此籌畫結數年不了之
局誠救時急着也第職查兩省開徵事例各殊
如河南省每石徵銀八錢繇州縣解貯府廩俟
府委官彙買至山東則該州縣差役徑解本倉
無現銀貯府矣至山東東昌府等係原例三百
里之內則徑徵收本色自運并無銀可徵矣且

兩省錢糧除遼餉外俱隔歲徵解則元年尚屬
來歲開納而七年正屬當年現輸今各州縣從
催督後陸續漸至有業經進倉者有方纔運到
者有運至中途速行稟報者有該州縣徵完先
申起程者正查收開本年十一月二十七日有
東昌在平縣解役崔東望將解到天啓七年臨
廣倉麥折米三百五十三石一斗八升五合秋
糧米一千八百一十六石二合七勺五抄二撮
俱已進倉晒揚候收忽持布政司改折批文并

無臺掛號票內稱准戶部咨將前米折價解京
職隨遵照咨文將米退出聽其臨期賣米變銀
第額係七年未知果作積欠否又查東昌武城
縣解役亦運七年米至中途被該縣趕回改折
河南祥符等縣解官買完七年米運至小灘延
挨旬月私賣奔回更餘棍役有久已領批乘機
沉匿兩處閃脫銀米俱無歸着職不知改折自
何年起至何年止舊逋無憑開銷新徵無憑提
催除將已投批運米在未奉

旨前起解者謹照舊徵收入倉外其餘見徵未完本色或始七年或始元年伏乞勅示施行等因到部蒙批七年應否概作積欠雲南司會新餉司議妥移文申飭此所關於庾政者頗自不輕奉此隨移付新餉司會議去後今准該司回稱查得臨德改折一項詳閱原疏內稱此銀自縣徵完起解本府轉發糧官糴買本色臨清交兌以備京運不足數年來米價騰貴各糧官苦於糴買遂將已領之銀或陞遷後仍繳府庫或前後

糧官彼此推延更將此銀貿易管運甚之有糧
官已更遷一二員而前銀猶逋相傳領者應催
各糧官將原領銀兩繳解布政司轉解新餉庫
則是此項銀兩既非州縣拖欠之數又無赴倉
兌收之期與其包摺於解官之手任意管運不
若權取以應遼左之急此劉給事中一以裕邊
儲一以釐積弊之至計也若如臨清倉所云運
到中途先申起程一槩改折不亦起紛更而奪
管倉之職掌乎似當繹原

旨而查原疏中外遵守者也等因到司准此查得臨
德二倉糧米原以備災傷補京庾之不足邇因
東事旁午每年以粟米五萬石助津門海運爲
軍餉惟是二倉之米例於各州縣徵銀解府轉
發糧官糴買本色上倉亦有州縣百姓徑自輸
納本色者祇因數年來米價騰貴遂有官民推
諉耽延之弊或陞遷繳還府庫者或接管遞相
傳領者甚有貿易營利者是救時濟急之美政
反爲奸宄侵漁之弊竇劉給事中議將歷年積

欠領銀在糧官者折價解抵新餉無非欲清舊
逋耳若以新者槩從改折不但兩倉空虛亦且
紛更

祖制明歲海運將何所賴藉乎第若七年元年似宜
照舊徵解本色以備明歲海運及地方軍儲之
需等因呈堂移咨山東河南撫按并劄示兩倉
外至正月初八日又奉本部送准山東撫院咨
稱崇禎元年十一月初四日准戶部咨稱轉行
山東布政司將臨德二倉未完糧銀咨府委官

原領銀兩星夜起文解部交納新庫充本年關
寧缺餉以後額糧仍徵本色造冊投部查考等
因備咨到院准此隨行嚴查催解去後今據總
理糧儲道胡一龍呈據濟兌青萊各府申稱辦
屬州縣應納臨德二倉糧銀歷年俱有拖欠其
東昌府申稱無德州倉止有臨清倉米係與漕
糧一同徵收完解歷年取有批迴在卷天啓六
年止有臨清州天啓七年止有武城臨清觀城
未完米石見今解京訖登州府申稱無臨清倉

止有德州倉米歷年俱係全完二府未有拖欠
無憑開報其拖欠濟兗青萊四府今奉

明旨查覈應遵改運充餉但節年間有花戶拖欠者
有奉文蠲停者亦有收役領解未獲批迴者官
吏書役人移物換參差紛錯難以一槩取必欲
候通查確實呈報誠恐遲悞限期先將天啓六
七兩年未完錢糧數目州縣清覈明白未經納
倉者註作未完實數令其改解赴京充餉其天
啓五年以上至天啓二三年間一時難以清焚

俟再水明另報等因并造天啓六七兩年臨德
倉糧已未完數目冊二本呈報到院據此查得
自奉文後嚴檄該司道速催蒲臺等州縣差解
役張曰政等解過天啓六七兩年臨德二倉糧
銀一萬一百八十三兩九錢六分零節次解部
訖其兩年尚有未完銀四萬五千五百餘兩一
面嚴催務期通完接濟急需天啓五年以前者
俟查明另文冊報等因又准河南布政使司稱據
河南布政司呈蒙本院案牌准戶部省前事仰

該司照依咨文一面移文督糧道知會一面差人分投各府將臨德二倉以前積欠米銀但有人現存府者即時起解於司尚貯州縣者即時起解於府或有委官領出延捱未買卽換給批文就令本官解部新餉庫交納務限十二月初一日盡數解司報完以後額糧仍徵本色毋得違錯等因到司蒙此隨差人嚴檄守催開封等八府并汝州查現貯庫銀兩刻期差官起解并追買米各官原領銀數起解充餉去後隨據開封

府現貯庫臨德二倉未買米銀共五萬六千三百一十五兩六錢六分二釐業奉兩院詳允委令洧州縣典史章克明領解外本司聞河南府未買米銀頗多卽以戶部差官李縉自往守催今據口稱現貯府庫與買米官未完銀數萬見今起解細查歷年積欠清數另造冊報又據汝州冊報現貯庫委官起解銀共九千一百一十四兩九錢六分今據開封衛輝南陽三府并汝州冊報銀數類造青冊除歸德彰德懷慶河南

汝寧五府造冊到日另送外擬合先行造冊呈報等因到院據此會同巡按河南監察御史張鑛擬合咨報等因又准河南撫院咨稱臨德倉糧劉給事中一疏准折上裨

國用下洗陳習將數年不結之局完於一朝業奉明旨俞允咨到轉令各屬遵依勿論遠年近年但有庫貯及解官領出悉行起解本院已將開封等三府并汝州自天啓二年至七年造冊逵部銀解過半今歸德等五府銀兩有見收在司備起

解在途若再令將七年買米倏更倏易不惟於
明旨有悖亦將何以取信於下乎合無俯照前

旨自元年以後徵解本色庶

國用糧務兩有裨益矣擬合咨請等因到部送司
查得除

明旨內出納全書遴選心計司官彙造一節已經本
部陝西等司案呈於正月二十七日具疏題覆
奉有

欽依外其山東河南兩省改折本色事宜合應具題

申飭案呈到部該臣等看得臨德兩倉河南山東之米歲該二十七萬一千四百一十八石在漕糧四百萬外原備各省直災傷湊補漕額運入京庾之數近年又每歲撥發五萬石以充津門海運之需所關亦甚重矣科臣劉安行以救時苦心爲酌濟長策欲搜積欠未買米價以濟關寧緊急軍餉又該見年仍徵本色爲遼左兼爲地方厥議甚善原無偏枯逮後兩省有司之奉行者州縣又苦於買納之艱官民各欲結賤

更之局遂有將已完之米仍復改折者且有置
遠年那借侵欺於不問而惟亟於當年改折以
圖輕省者竊恐兩倉從此漸虛海運將何接濟
則雖於遼左便而於地方不便亦非科臣搜剔
積欠之本意矣此該倉所以不能無言而臣鄙
亦不得不申飭總之爲職掌亦爲倉庾計也茲
據河南山東二撫回報前項銀兩或已解到京
或起解在途具覘諸臣急公之心足爲闕寧待
哺之助然在河南止據開封衛輝南陽三府并

汝州查明冊報自天啓二年起至七年止共欠
臨德二倉米折銀一十四萬六百六十七兩內
已解到部銀七萬一千四百六十八兩一錢六
分五釐其歸德彰德懷慶河南汝寧五府尚無
細數在山東止查有天啓六七兩年共未完臨
德二倉米折銀五萬五千六百八十三兩九錢
內已解到部銀一萬二千八百七十五兩三錢
七分八釐其天啓五年以前據稱一時難以清
楚未經造報是則二省俱屬未結之局亦爲不

了之案夫河南米折多貯在官則一絲一毫皆公家物也而歸德等五府查核何以迄今未確山東米折多欠在民然已徵已解亦未必無也而天啓五年以前完欠何以迄今未清未徵在民者或可援近年之

恩例以希寬假已徵在官者決難徇奸貪之官吏而潤私囊竊計天啓元年以後均當徹底清查分別完欠搜括起解以杜弊端以充軍餉決不可因循苟且已報者不解未報者不查徒爲含糊

了事而於倉庾遼餉兩無當也

明旨奉自去冬本色之議似當斷以元年爲始然有
壓徽州縣又當以七年作元年論第准河南山
東撫臣公移私揭皆以米貴價騰願得改折以
造子遺之命則第以元年爲始可矣一年倉糧
若肯全完其數亦不貴矣第本色之所以不完
者其弊有二一則有司漫不督催惟恣影射而
倉司莫可誰何今自元年爲始年終該倉各具
完欠清數報部臣部照例而叅罰焉其中州八

錢之價果有不敷不妨隨時請詳酌量增益則
倉糧之不完者鮮矣一則倉司不加鈐束聽信
積役魚肉小民凡解糧至倉者如蹈湯火只得
任從積棍包攬蕩產破家不可勝計今後倉司
痛革常例兩平收納毋令衙役得以上下其手
棍徒得以指騙其間則倉糧之不完者亦鮮矣
况以前猶有節年逋負可以陸續接濟今止存
元年一年耳若有司之玩愒如故而不加意於
輸將倉司之因循如故而不設法以招徠倉庾

何賴海運何賴臣誠不得不鯁鯁慮之也必令
有司與倉司交爲黽勉庶閔寧藉充餉之利隲
德無匱乏之虞而海運亦有接濟之便矣旣經
該司案呈前來相應題

請恭候

命下臣部行文山東河南撫院并各都察院轉行二
省巡按御史仍劄臨德二倉監督司官一體欽
遵施行

崇禎二年三月初九日具

題本月十三日奉

聖旨臨德兩倉積欠皆因官吏侵欺該倉司卽清查
自天啓元年以後完欠實數報部督催起解其納
本色着以崇禎元年爲始務釐積弊及期全完毋
得違玩欽此

覆總督倉場南少司徒條議倉庾儲積疏

題爲再陳倉庾空虛儲積宜預並攄末議以效微
忠事雲南清吏司案呈二月二十四日奉本部
送戶科抄出總督倉場戶部右侍郎南居益題
前事等因奉

聖旨嘗額外另撥庫貯漕糧外帶運倉糧是否確便
可行該部再行酌議具奏欽此欽遵又該戶科叅
看得太倉積儲無論

國初卽嘉靖年間庫鏹不下四百萬倉儲則足

年之用至萬曆年間已減強半然尚六年支也
今則糧不足一年銀則僅存三萬脫有緩急豈
不袖手坐困哉邇來議汰浮冗不過纖塵涓滴
碎難挹注非有破格之著數恐亦終成虛舟茲
倉臣目擊空匱憂心如焚擬分郡邑之儲稍益
京輦之蓄雖云補救目前萬不得已然而無加
派之苦無飛輓之煩陳陳相繼真大有裨於國
計當事者不得株守常格築舍道傍而已也但
所當申飭者則止分郡邑額內之徵收而非借

貪墨額外之谿壑所當酌定者則應解若干而
不得盡空其所有應解幾年而不得便執爲成
法是在當事者之請

旨定奪耳抄出行之等因到部送司奉此查得督部

疏開

國用匱乏議將司府州縣存積銀糧酌量多寡分
解太倉以裕倉儲復該戶科抄咨前來相應議
覆案呈到部該臣等看得

國家頻年多事經費浩繁其在

祖宗朝帑藏之殷實廩庾之充溢不敢望矣查大倉
老庫天啓三年管庫主事楊紹震任內盤查尚
存銀八萬二千四百八十餘兩外短少銀六千
五百一十餘兩發刑部追賠天啓六年前任尚
書李宗延將摺省無礙銀二萬七千一百八十
兩零歸還老庫又續收刑部追賠短少銀五千
四十餘兩共實存銀一十一萬四千七百餘兩
天啓七年正月內前任尚書郭九厚題發老庫
銀六萬兩給工部製器崇禎元年五月內

左侍郎王家楨又題發老庫銀二萬五千兩給
大同充餉今共實存老庫銀僅二萬九千七百
餘兩矣查京通倉糧天啓元年五月內尚存五
百三十餘萬石可支二年之用寬然有餘今見
貯京通倉止二百四十五萬石每年支放本色
十閱月每月放米二十四萬石有零通計一年
前米可以立盡又應放米折兩月常苦不繼或
不及期猶借資於本色則倉糧不足一歲之支
矣夫中人之產數口之家必有私蓄以備非常

今堂堂

天朝而窘迫若此萬一災稜叠見邊警輒聞索取無
應何恃而不恐督臣之慮誠非私憂而過計者
其議責成各省直撫按將各司府州縣倉庫存
積銀糧盡數查明量其多寡銀以十分之三糧
以十分之五解入太倉仍計一歲所入遞年分
解限以遼事平定之日爲止銀則隨糧搭解糧
除南北不通舟楫省分聽其改折其山東河南
江南諸省凡漕運所通之地俱付漕糧帶進夫

督臣非不知先年搜括捐助汰冗抽扣解稅平糶倉穀久已行之值此倉庫告匱之時不得不再爲破格之舉耳蓋所謂存積者卽司府州縣所設軍需備賑常平義社等倉之所存及司府州縣印官每年自理紙贖之所積也此非小民額外之科派亦非賦役額內之徵收每年多寡俱有定數按籍而稽銀取十分之三是矣惟是秋冬積穀業已題

准折銀充爲遠餉及遇地方災傷又賴煮粥濟饑所

用甚繁所存無幾則姑取十分之三可也其漕船以帶運遼米矣何堪又復帶運倉場從長而計似不若通解折色之爲便也蓋折色亦可作米抵放月糧每年多放一月折色則太倉之米自有積儲矣况通解折色亦不必論地方通舟楫與否其糧米折價聽各該撫按查照時估隨糧搭解交納太倉極爲省便行之四年遼事可以漸平太倉可以漸充

輦穀可以無患是在各該撫按殫心共爲查報耳但

恐簡僻地方有司存積少者藉此以恣聚歛饒
沃州縣有司存積多者借名地方有事隱匿不
以實告皆非同舟共濟之誼是又在各該撫按
廉訪奉行虛實以爲勸懲可也夫各省直撫按
司道府運州縣昔年不常幾千幾百助餉乎又
不常幾千幾百助工乎此皆懾於逆璫之氣焰
耳夫地方無礙錢糧原難預定政如風中掃葉
隨掃隨有諸臣誼切急公憂深體

國獨不可捐昔年之半以爲老庫緩急之助乎再

查臣部新舊兩庫司官有任滿報羨者卽係額
外之數每年通共可得萬金似當收入老庫以
備積貯又臣部公費銀兩近日絕不妄用分毫
除陸續助邊外每年亦派千金收入老庫庶幾
積少成多以備不時緊急之需年終清扣明白
具實

上聞本部雖甚匱乏危迫之秋誓不輕動老庫一鎰
一銖此臣區區所自盟也其各省直應運漕糧
不許改折截留屢奉

明旨炳若日星若帶運遼米四十五萬原非正額其實實截漕者止鮮運十萬石今歲臣部因畿南告荒減買米石卽於通津二倉用價收買軍糧抵之此法若肯常行各府召買如故卽將鮮糧減截數萬無難也以後但寧儉於十萬之外而

乎益於十萬之內申飭津門著爲定例每歲督

催漕折輕賚支放米折兩月務求不愆斯會無得以本抵折此又臣愚嘔心之膚見也臣因老庫倉糧空匱憤懣久矣故因督臣建議儲積而

併披瀝及之相應覆

請恭候

命下臣部通行各省直撫按轉行各該司道府運州
縣及劄新舊兩庫一體遵奉施行

崇禎二年三月二十五日具

題本月二十九日奉

聖旨俱依擬行欽此

覆餉院錢士貴題議設法剝運漕糧疏

題爲微臣東巡事竣謹陳津運事宜併目擊漕糧
露積剝運艱難之狀仰塵

聖聽事雲南清吏司案呈崇禎二年四月初三日奉
本部送戶科抄出督餉省直巡按監察御史錢
士貴題稱前事等因三月二十五日奉

聖旨這津糧原派運價着行地方官刻期解給露囤
漕糧上緊剝運附近支放速酌妥行董中行留用
已有旨了該部知道欽此欽遵抄出到部送司案

呈到部該臣等看得漕運關乎軍儲軍儲關乎
國本邇來倉庾匱乏粟僅可支一歲所云餘三年
九年之食者不可望矣復以截漕觀望守凍稽
遲煩我

皇上日夜焦勞臣等殫精竭智求所以轉遲爲速者
已無遺策欲圖新運不愆其期必毋船先回空
而後可今奉

欽限三月回空者業已盡數回空矣至露囤一節誠
萬不得已之計近遵奉

明旨五日一報計此五日一運其入京倉者可得米
七萬餘石通務二處剝船協力併運復併它運
邊糧泓船亦運聞大小船將近二千隻查崇禎
元年起運天啓七年分兌改漕糧四百萬又帶
運遼米四十五萬共四百四十五萬石內除永
折三十二萬七千四百九十七石七斗八合又
除派上天津昌平薊州密雲各邊倉兌改糧四
十五萬四千九百四十七石三斗又除南京截
留米三十三萬一千一百零九石五斗八升又

除天津截留五十五萬石實該二百七十八萬

六千四百四十五石四斗零自元年八月十二

日祭壩起至二年四月十一日止進過京倉九

十五萬四千五百零八石通倉二十九萬五千

二百三十六石零又陸運通倉二十一萬一千

六百九十四石九斗零又兌給通軍四萬四千

一百五十石零又代津門買米一萬石連前共

運過一百五十一萬五千五百八十八石九斗

零應該起運囤米猶有一百二十餘萬之數

矻河干如茨如櫛繇楊蔡村上達務關一望無
際臣每念及不覺肝腸欲碎督餉御史錢士貴
以東巡目擊心痛未雨綢繆乃有給兌京軍量
加脚價之議深謀遠慮何以加焉臣於去冬有
漕艘凍阻宜防一疏亦擬條議及此祇因先年
京營有十四不便之說是以中止只於通軍豫
兌四月無奈其人有限而米無窮也今時急勢
迫矣恐大旱之後時雨應禱而此露國者毫無
遮蔽萬一朽爛斷送京軍之性命臣寧有死所

乎目下應急之方惟有雇民船一節最爲便
臣聞天津楊村等處河口民船鱗集其不肯爲
公家用者惟恐官不給以價不給以時值之價
遂其願載民貨與載官糧同一取利誰復肯役
焉且官船尚中途沿捱乘機盜取如民船日夜
催趕交割卽謝伊擔合民船官船一齊併運則
此百萬餘石閏四月間或可入倉而顆顆粒粒
皆爲公庾中物矣然民船隸於該管地方非與
以價而給以時誰肯鼓舞而急公者伏乞

勅下天津與霸州二道臣責令雇覓民船通糧廳照
例於輕賚內給價躬親督催大示鼓舞待糧完
日論勞題敘固權變之計亦救急之術也既經
督餉道臣錢士貴具題前來相應議覆恭候

命下臣部行文天津霸州二道及坐糧廳河西務鈔
關等衙門一體欽遵施行

崇禎二年四月十七日具

題本月十九日奉

聖旨是着卽行道廳關務各官速催民船奏劄仍星

夜設法督催其船價通糧廳動支輕賚銀現給
得虧值病民完日論勞題敘該衙門知道欽此

題覆漕院京糧量改通倉疏

題爲剝運尚需時日久稽恐生他虞謹就一時權宜之計仰祈

聖斷事雲南清吏司案呈四月二十三日奉本部送戶科抄出巡按直隸監察御史楊中極題前事內稱在剝在圍者一百零七萬九千有奇合而計之尚需四五轉方完則當在閏四月末旬矣土壩附近倉廩轉運稱便見今糧少役閒欲將正兌京糧改撥通倉不惟節省金錢亦且早完

春運米以船運船多則運速原額船隻自火
壞未免有缺查其缺者補之敝者修之米到卽
剥則回空起囤兩者俱速等因四月十九日奉
聖旨這囤糧正兌暫改撥入通均運該部卽與議覆
剥船還着該管官修補如額本內遺一起字改正
行欽此欽遵抄出到部送司除備劄關廳將剥船
遵行修補外議覆間又奉本部批據京倉欵項
等役沈海等告爲京倉極匱

京師堪憂懇乞亟實京庾以救萬姓事內稱

京師重地軍民咸仰給漕糧今六倉儲蓄不過百餘萬石今歲掣坐雖有一百七十八萬而實入厥方七八十萬石每年給軍及出二百四五十五萬石是出浮于入即使正允盡數交京猶疑不足况今春改通兌軍已去二十七萬石通倉糧斛何曾稍補入京今因糧囤河干復有改通之議以爲改通廉省脚價孰不知設立京通二倉各有正兌改兌糧石分有定額見今京倉空虛何謂廉省脚價通役鑽謀遂運官之志壞

朝廷之法海等聞之警駭况六倉懸罄萬有不虞將

害不淺此皆根本利害所關不敢不言至於倉

役希領輕賁以當公差尤其小耳等情到部奉

批雲南司查議奉此查得正允京糧改撥通倉

事關庾政業卽備咨總督倉場會議去後今於

閏四月初十日奉本部送准督臣南居益咨稱

隨行京糧廳查議去後續據該廳主事趙建極

呈稱查得京糧改通一事在漕院目擊時艱條

畫入

告雖一時權宜之計實公私兩利之術蓋京通雖云異地其爲

國儲均也以京糧而改之通異時卽以京軍而還取諸通又何差殊焉惟是正兌改兌原係

舊制入京入通從有定額查舊例京倉每年該糧二百二十餘萬石見今七年分自去年交納併今年歲起囤實入京倉者不過一百二十萬零如咨文中所開京倉歇脚沈海等京倉極匱一詞所言六倉虛實與改補數目亦非無據雖持論之

心與劉自才等均圖自便而其以根本重地爲
言則亦私中之公也事干重大應否改撥本部
自有電裁非職廳所敢擅便也等因到部據此
看得漕糧之入京通二倉也正兌改兌成例在
前似難移易况今京倉匱絀扶陳支放新者不
入則舊者益竭揆之時勢更屬可虞惟是此
凍糧起剝地遠時久水陸脚價所費不貲而通
庫告竭車戶稱累量改入通計省物力而惜民

勞裨益

國計亦復不抄漕臣之論洵有見也若夫酌量分
數前部自有權衡煩爲查照等因到部奉批查
算見存未運正兌若干改兌若干酌議速題奉
此該本司查得漕糧四百萬石內除永折糧三
十二萬七千四百九十七石七斗八合又除撥
運天津昌平薊密邊倉糧四十五萬四千九百
四十七石三斗該進京通二倉兌改糧三百二
十一萬七千五百五十四石九斗九升二合內
應進京倉正兌糧二百六十二萬二百一十石

六斗六升五合通倉改兌糧五十九萬七千
百四十四石三斗二升七合二項內除津留
運糧一十萬石又除南京截留三十三萬一千
一百零九石五斗八升又除京倉進過正兌糧
自崇禎元年八月十三日祭壩起至本年閏四
月初十日止共計一百三十萬有零又凍糧陸
運通倉正兌二十萬有奇約在國在剝正兌糧
七十餘萬通倉進過改兌糧三十五萬有零約
在國在剝改兌糧一十餘萬合應卽議具覆奏

呈到部該臣等看得漕糧正兌撥入京倉改兌
撥入通倉此舊例也去冬以運期稽遲漕糧凍
阻堪憂因以正兌二十萬零餘陸運入通倉總
欲運船回空不愆其時故爲是通融計耳今漕
糧回積河干別無良策惟有多覓船隻協力糾
運業已奉有

俞旨然而焦愁私慮漕糧一日不盡入倉臣心一日
未敢卽安今漕臣見漕糧未入倉者尚有在河
在剝八十餘萬爲途較遠而淤淺處難以刻期

報竣又見車船戶劉自才等告稱船袋空閒欲
分運入通倉脚價省而撥運速不第漕臣稱便
卽臣亦未始不以爲便也顧臣竊有憂焉而終
不敢謂盡可行者京庾集宇內糧餉王者所以
居重馭輕也通倉爲

國家外儲特以備不虞耳今三大營等官軍十餘
萬衆悉賴漕糧養生前欲赴通領糧仍以往返
稱苦今積之京倉者亦自無多再分撥於通倉
則通多而京少恐支領艱難京軍必不樂職一

也既已坐廢而後更張朝三暮四法度不信三
也官旗人人觀望希圖兌通權宜之術而爲經
久之計後必多弊三也且京通二處車戶脚價
相去不遠所省者不過石壩至大通橋之費耳
每石銀二分七釐總十萬石計之不過省二百
七十金况通州車船在土壩外者業已分撥無
停刻而稱閒者獨土壩內車船故車船之多未
有如石壩內也但念時日既促陰陽人道之患
誠不可測當行總督倉場再撥十萬石運通倉

以速轉輸此輩得以有事爲幸漕糧得以早完
爲福亦便計也至於剝船修葺隨壞隨補每年
取足輕賚銀兩臣部蚤行督催不敢少緩旣經
天語申飭先事料理有備無患其於新運漕政所補
裨者多矣旣經漕臣楊中極具題前來相應會
議覆

請恭候

命下臣部移咨督臣併咨都察院轉行倉漕御史及
劄京通二糧廳河西務鈔關一體欽遵施行

崇禎二年閏四月十四日具

題本月十七日奉

聖旨這京糧改通姑准再撥十萬石以後正兌務遵
舊制盡入京倉露囤着速催剝運剝船修補申飭
行欽此

題履指揮祁天祐經歷劉岱互訐疏

題爲衛官盜

國侵軍貪積不法伏乞

聖明勅追助餉并憐貧升之寃肅堂屬之體以勵人
心事雲南清吏司察呈三月初六日奉本部送
戶科抄出

慶陵衛掌印指揮使今去任候代祁天祐奏前事等
因二月二十九日奉

聖旨剝軍衛官積弊劉岱扣尅票銀等事該部嚴查

具奏欽此又該

慶陵衛經歷司經歷劉岱奏爲貪黷武弁侵屯竄
國妄奏欺

君謹陳始末懇

賜併勘以完

國課以彰法紀事等因三月十四日奉

聖旨該部一併嚴查具奏欽此欽遵通抄到部送司

該本司查得票銀屯糧事隸倉屯衙門隨該移
會查覈去後三月十六日准巡倉御史宋師襄

揭稱案查各衛票銀一事先年節該前差沈從
史張御史題

准每衛每年于四十兩月折米銀內每軍扣銀一錢
二分收充各衙門及該衛造冊紙張工食等費
令經歷司登報循環送職差查覈後該戶部請
查浮費復該接差方御史酌議各衙門造冊紙
張工食等費恐朘軍膏務在減省註有條款定
規每年每軍止扣銀八分遵行在案自去歲復
差之後該本職照例備行七十七衛經歷司作

速置簿送印發填去後內有照式填報者有
簿印發未填及連簿未送用印者本差正在查
催而移查之文至矣相應據實回覆以憑具

奏施行等因四月三十日又准督理印馬屯田御
史羅元賓回稱卽行昌鎮管餉官查取該弁經
收屯糧年分并已未完的數去後據本官回稱
該衛掌印指揮祁天祐自天啓六年起至崇禎
元年止每年經收本衛原額子粒等銀共五十
九兩六錢八分一釐四毫計徵三年共一百七

十九兩四分四釐二毫分釐未解等情到院據
此查得錢糧係軍

國急需屯官崇徵印經覺察各有其責祁天祐以
印官而侵糧反欲抵以未歷之官俸而憾劉岱
之具呈是真目無三尺矣今餉官冊報侵欺已
確俸抵無例應照嚴追以完

國課以正厥辜者也各等因到司查得祁天祐與
劉岱互奏前情已經倉屯兩院查會問其票錢
票銀之說在

凌軍四十兩月每軍四分共計一歲出銀八分在京
軍每月出錢四文合來亦八分之數非票銀之
外又有票錢也業經題奉

明旨七十七衛以八分爲定額作各官役心紅工食
紙張等費隸巡倉衙門設立循環簿籍遞換稽
查立爲永規恐此外巧立名色剝削軍士查天
啓五年以前倉差未缺似無容議矣據天祐掌
印年分在天啓六七年間此時倉差已裁其支
放銀兩自應銷算遂拘岱將兩年文冊挨次開

註據其支領心紅紙張工食俱有各官吏名字
存有印領在卷在代以爲毫無染指而天祐以
爲未盡給散非該管衙門按冊磨勘虛冒情弊
有無卽懸坐以罪又烏能服其心乎復查祁天
祐所欠之屯糧業經查確乃欲以未歷俸銀抵
還正項覆查已從無此例矣但此項銀兩果拖
欠在軍而代人受罪情或可原倘侵入私囊已
犯監盜之律卽革任亦未盡厥辜者也相應題

請

勅下倉屯兩院衙門覆覈查追則二官亦無所遁其情矣案呈到部該臣等看得票銀二項設立已

久劉岱身司出納不能冰蘖自茹而來天祐之

指摘雖云天啓五年以前崇禎元年以後隸於

倉差稽有循環各有印領在卷而六七兩年間

倉院未設岱果能一一盡歸公費而毫無染指

耶但查天祐與岱共事知之既真何不先事發

覺追穢跡彰聞身掛彈章始爲下水拖人之計

情屬可疑似難懸坐必俟該管衙門將岱收放

銀錢逐一清算有無虛冒確有的據而後可以
正其罪服其心者也至於祁天祐握篆三載經
管屯糧分毫未解其爲侵冒無疑及被許發及
欲以未歷之俸銀相抵委屬玩法卽革任亦未
盡厥辜第就中豈無一二花戶之拖欠者乎侵
漁情弊更宜研審明實繩以三尺又何詞焉此
二官者身犯竊鐵之疑難逃三尺之法然事關
錢糧不厭精覈伏乞

勅下倉屯御史衙門銷算追比庶貪穢者無所容其

蠹奸橫者無所事其巧而軍儲官箴兩有所裨
矣

崇禎二年閏四月十七日具

題本月二十一日奉

聖旨着巡視倉屯衙門確覈追完具奏欽此

覆安福鄉紳請分洒帶運疏

題爲臣邑漕運獨苦勢窮變迫宜權謹陳救濟之方以甦軍民之困事雲南清吏司案呈崇禎二年閏四月十四日奉本部送戶科抄出吏科等衙門給事中等官劉垂寶等題稱前事等因奉聖旨據奏該縣漕累甚悉這分洒帶運事着卽與確覆餘移該撫按議行該部知道欽此又該戶科叅看得運軍之苦幾如倒懸而安福一軍據疏所臚列則又不啻倍之其南左帶運每艘不過五

石而歲可省料價千六百餘金兩奉

明旨無容異議矣其原額四十二艘有查協濟去蠶
各款酌利去害瞭如指掌夫在外有有司在內
有計曹凡編審給發等項原不應委之各弄之
手彼其剝軍肥已亦何厭之有而私罟則軍民
兩溷受賄則貧富俱空扣除科派之誅求包攬
冒領之狡詐不幾飽貪弁之鼠腹而虛

朝廷之德意乎此疏真是欲絕之呼而撫按議行之
旨有同如傷之視其應何僉派應何禁革應何拯濟

要之不以軍累民而又不以運累軍新漕屆期
不容少緩以困此一方也抄出速之等因到部
送司案查本年四月二十七日戶科抄出南京
兵部車駕司主事伍承載奏爲臣卿軍民備極
困憊漕非洒帶無以解焚舟之厄田非清丈無
以濟加派之窮敢懇

聖明速沛德音以救殘黎事奉

聖旨這所奏二款有裨漕政民隱該部卽行酌議具
覆欽此抄出到部送司議覆間今奉前因相應通

查併覆案呈到部該臣等看得安福一所江右
彈丸地也額設運船四十二隻後以宸濠之變
爲南昌衛代運二十隻距今百餘年矣其間貧
累者已非一家逃亡者亦非一戶未敢求帶運
於別船也至今一幫盡付灰燼情豈得已况小
患通幫大患通省舊例昭然且以二十船之糧
分洒於三衛八所計船不下八百四十餘艘卽
分帶不過五石衆輕易舉人所樂從復有隨船
行月糧銀兩照給各船誰其敢吝焉糧旣酒帶

修船料價銀五年所積約有一千六百餘兩合以崇禎三年爲始編入正額解充邊餉永爲定規無容再計其本所應造船隻各軍卽易子炊骨敢不竭蹙以供奔命但造船一隻約費至三百餘金蓋慨未揚而中人之產已破矣計大修料價每船不過八十兩行糧每人不過五兩守候往返爲費不貲欲甦其困而不量加協濟可乎查該縣原有兌剩餘銀前任朱知縣每船曾分給四十兩此項銀兩自應每年查有剩餘若

千每船應給若干於起運日并行糧銀該縣當
堂分散各軍旗照數支領毋落所官之手則均
霑實惠矣軍旗五年運滿更替或有以船載私
鹽私貨展轉鬻於商人而上下手更替不過與
銀二十兩者既領銀在官則船爲官物豈得私
鬻總皆官旗串通貓鼠之故智耳今後除漂沒
沉燬不論外回空之日將船駕赴水次旗甲舵
工共遞執結糧儲道將蓬桅等物逐一開明查
驗彼此交替不得乘機盜賣私相授受經營者

愈加愛惜而承受者不苦創修又以運軍之子
粒易班軍之月糧一轉手而兩得其利是造船
賠累所當優恤者此其急圖也然而不止此也
受病有源講求宜悉倉派果盡公平包攬果能
祛乎夫軍有軍差民有民差則籍不容濶也因
戶分差差以產定則派不容濶也惟賣富差貧
桃僵李代倉派一番只爲所官做一番生意是
在有司秉公戶籍分明貧富均搭不徇情面不
畏強禦不侮瘵寡使所官不得高下其手而株

連無干可耳漕糧重務自宜正身駕船不容頂替而年來衛官積棍百方包攬以致敗乃公事株連無辜今後責令糧儲道嚴加查訪運官照船造旗軍年貌冊聽候沿途抽幫查點不許私自包攬侵糧遺累正身赴運既多則沿途防護自嚴而漂沒盜賣之弊可漸杜矣尤可痛恨者督運所官視筭筭軍旗如几上之肉任意蚕食而莫可誰何將各運軍安家月糧具文支領或加一加二扣除使費甚至分文不與復藉口於

運事完日算帳而後給散仍巧立名色上船有
鋪陳打醮出行之費有派送把總上船暨生日
禮物及免提家屬之費又有折取糠碎銀濕潤
銀并過河議單銀上京各倉走糧幹辦之費月
糧幾何種種分派盡入官囊有不足者本官放
債以一當十萬不得已或中途潛逃至疾首痛
心而苦不可支又將所解漕糧沿途侵賣花費
假言賠累將各軍回空羨餘釐纜銀兩乃

祖制所以恤窮軍守凍者竟自包領爲抵欠之資窮

軍終歲駕運

朝廷恩賞銀兩分毫不見猶鬻妻賣子以償所官之
債無怪乎運軍之富者貧而貧者死也此從來
大蠹牢不可破者也非外而糧儲道內而坐糧
廳加意給散又安能救藥於萬一乎夫代運重
累造船艱難軍民交病此三苦者固安福一軍
獨受之而僉派不公需索無度包攬難堪此三
苦者又合漕運軍全受之臺省三臣惟見之也
真則言之也詳慮之也遠則計之也周亟宜

初下督漕并該省巡撫衙門嚴行禁革蚤爲拯濟寧
第爲安福解倒懸且將爲全漕拔病根者也至
於清丈田畝如南京兵部主事伍承載所請者
查隱占清飛詭豈不有裨於民瘼第事體重大
輿情貴協民風土俗惟身任地方者乃能周咨
且聞舊例一經清丈人情觀望勢必停止徵收
稍遲正供所關尤爲不細其安福吉水二邑田
畝果應清丈與否仍聽彼中撫按查議酌行而
臣部未能懸擬者也蓋漕船一事在安福軍累

已極亟宜著令洒派用蘇倒懸而并革從來之積弊清丈一事在二邑民隱攸關尤恐議論未一或滋聚訟則仍聽地方之弊畫既經科臣部臣具題前來相應覆 請恭候

命下臣部行文總督漕院總督倉場及該省撫按衙門一體欽遵施行

崇禎二年五月初四日具

應本月初八日奉

聖旨是欽此

剝糧事竣敘錄在事各官疏

題爲恭報起剝糧數告竣事雲南清吏司案呈本
月初十日奉本部送戶科抄出總督倉場本部
右侍郎南居益題稱前事等因崇禎二年五月初一日奉

聖旨這漕糧露積剝完知道了南居益提挈勤勞分
任在事各官着從優紀錄該部知道欽此又該巡
按直隸監察御史宋師襄題爲恭報起剝凍糧
告竣並述在事効勞諸臣以慰

聖懷以明臣誼事等因本月初二日奉

聖旨知道了各官着從優紀錄欽此欽遵通抄到部
送司案查先該巡漕潘御史題爲今歲漕舟早
凍明歲回空遲極等事奉

聖旨催新運全在急回空着戶部卽行通廳務關查
驗剝船務足原額一俟凍解卽行起運仍分派委
官嚴立期限晝夜饋剝定要二月內盡起凍糧三
月初悉發回空以便漕運如或怠緩悞事倉漕御
史叅來廳關該管官必罪不宥凍糧後剝運糧數

倉臣嚴查五日一奏報完日爲止該衙門知道欽
遵備行去後隨據通廳務閔呈請寬限前來該
本部覆奉

聖旨漕船着巡漕御史楊中極星夜催償抵閔剝船
着總督倉場同巡倉御史宋師襄立限催剝過
糧數遵前旨五日一奏報廳閔該管官親行往來
督刷不得預請寬限以圖卸諉白糧係內供急需
白剝漕剝不許混淆該衙門知道欽遵通行去後
今奉前因該本司查得漕糧阻凍回空愆期億

萬囤積於河干卽有神運鬼輸方苦無策茲仰
藉

聖主之威靈上下同心戮力勒限入倉及期告竣矣
此一役也當萬艘鱗集露積堪憂或京通分運
或設法催船俾二百萬露積不踰期而盡歸天
庾且省凍糧陸運腳價不下萬餘金總賴本部
拮据籌畫於上至於新舊巡漕御史楊中極漕
士遴往來河干總督倉場侍郎南居益巡倉御
史宋師襄五日

奏報漕儲道周鼎等分任於下羣力畢集共襄運
務皆念切

國儲夙夜焦勞不遺餘力此正

明旨所謂在事諸臣俱應一體優敘者也至於卑職
仰體台意文移催儻朝夕不敢怠緩職在承行
幸免罪謫今事應具覆其在事勞臣尚未開悉
應否併敘等因呈堂奉批督部及倉漕二院督
催賢勞其餘各官亦當查照舊例敘入若本部
方以病困

請告不必及也奉此案呈到部該臣等看得去冬糧
船凍早解遲復值河淤水淺艤艫不前爲數甚
多爲途更遠此百年來未有之事若待冰渙水
深然後起糧回空愆期新糧必遲賴

皇上威靈諸臣協力如總督南居益巡倉宋師襄巡
漕楊中極潘士遴提綱挈領漕儲道周鼎通糧
廳郎中丁流芳河西務鈔關主事王四聰管河
郎中董中行大通橋主事孫士髦雲南司署司
事主事薛邦瑞分猷竭履經營露積拮据催剋

乞運郎中楊應宿監督西倉郎中楊應震監督
中南倉主事周京輪流催僱使船雖凍而回空
覺早糧雖剝而顆粒無虞亦近日僅見之績勞
允宜惠徼

特典紀錄優敘以爲服勞急公者勸也及查天啓七
年凍糧運完雖有題敘加級之案今亦不敢比
擬前例矣旣經總督巡倉二臣具題前來相應
具覆恭候

命下吏部將在事諸臣南居益等一體從優敘錄施

行

崇禎二年六月初四日具

題本月十三日奉

聖旨楊中極併當時在任各官肆慢遲漕雖經催償
剝完功過僅足相抵俱不准敘錄欽此

獲總漕漕院查叅擅截運弁疏

題爲漕糧擅截非法運弁管求當議謹據實糾叅
以明

國法以裕京倉事雲南清吏司案呈崇禎二年閏
四月二十八日奉本部送戶科抄出總漕部院
李待問題稱前事等因奉

聖旨該部知道欽此又該巡按直隸監察御史楊中
極題同前事奉

聖旨該部知道欽此欽遵通抄到部送司查得南部

截留漕糧扣追旗軍行月等項糧銀并營截各
官降罰緣繇相應具覆案呈到部該臣等看得
南部截留漕糧所有尖耗等米原議悉聽南部
如數追收作正銷算無容再議惟是旗軍行月
等項糧銀合當逐一扣追還官不容寬假今據
漕臣查照淮揚截留徃例再酌兌運水次遠近
計程追給事甚妥確如兌應天糧者至南京止
二三百里月糧准給二箇月扣追十箇月行糧
全追如兌蘇常糧者至南京五百餘里月糧准

給四箇月扣追八箇月行糧准給三分之一如
兌江西糧者至南京一千二百餘里已有涉江
過湖之險道里頗遠行糧月糧各追給一半又
京衛各船例有雇募水手銀十二兩食用米二
十四石合於兌應天糧者追銀十兩米二十石
兌蘇常糧者追銀八兩米十六石兌江西糧者
追銀六兩米十二石亦當照地里之遠近而爲
之追給者也又有隨糧一分銀原給各軍添贖
募夫之用今各船未涉黃淮未歷淺溜委應免

給其三修銀兩原係給軍辦料修船隻似應免追至于輕賚蓆板等項除蘆蓆本色三分各船隨糧交納南庾鋪墊應准開銷餘俱有司徵解通庫尚未給散不煩追扣已上各項銀兩應着總漕衙門清查的數解部助餉無容延緩者也乃若管截奸弁法所當懲除興武衛指揮吳國俊江陰衛千戶蔣國勳鎮南衛千戶梁世勛虎賁左衛千戶袁貞吉府軍左衛千戶譚昌言等五員係原允應天府屬漕糧在題奉

明旨准截十萬數內姑從免議外如龍江左衛指揮
劉堯俞張天倫龍虎左衛指揮李民表豹韜衛
指揮郭祭壩等四員倡議箕歛罔法鑽管頓舟
不前示當事以勉從之勢作俑無忌啓同儕以
效尤之端委屬罪魁所當從重降職二級如江
陰衛指揮劉羽侯龍江右衛指揮潘希岳房士
俊豹韜左衛指揮徐文元水軍右衛指揮蘭應
兆徐州衛指揮張丕烈橫海衛指揮張景良顏
可畏虎賁右衛指揮呂希望水軍左衛指揮許

太僕府軍後衛千戶李國禎廣洋衛指揮徐
會等併等十三員罔識急公惟知趨利雖曰
因人成事安辭規便翫法念非首倡姑從減等
應各降職一級其水軍左衛指揮張弘化府軍
衛千戶劉惟清府軍右衛千戶潘鯨鎮江衛指
揮董以貞等四員雖在

准截十萬之內然非原兌應天糧者惟時應天兌完
之糧九幫俱已開行過淮去訖數尚未足勢不
得不留別次之糧以補數論事不無覬覦據情

尚有可原相應各罰俸一年以警將來錦衣把
總蔣一元旗手把總馬忠上江把總崔美瞻下
江把總呼鶴鳴揚州把總周禮五員職司總運
才乏防範既任官旗之管截復容船隻之逗遛
耽延悞運降罰難辭除蔣一元病故免議呼鶴
鳴應從新任罰俸一年示懲外馬忠崔美瞻周
禮應分別降罰第今漕務方殷漕臣又從寬政
馬忠等三員合令戴罪督運俟新運過洪果能
早到准與自贖仍行薄罰如再延遲兩罪並究

是開使過之門以觀後效者也既經漕撫會同
巡漕御史具題前來相應覆

請恭候

命下臣部行文總漕衙門將各軍應追行月糧銀并
京衛各船水手銀米查各實數解部助餉仍將
一分釐夫及輕賚蒲板等銀各該若干俱逐項
查明報部查考鑽營各官分別議處通行各該
衙門遵奉施行

崇禎二年六月二十日具

題本月二十三日奉

聖旨是欽此

漕運凍阻可虞沿途催僱宜亟疏

題爲漕運凍阻可虞沿途催僱宜亟謹據實奏

閔仰祈

明旨振飭以裕

國儲事雲南清吏司案呈八月十七日奉本部送據管理坐糧廳署郎中事主事丁流芳呈今歲自七月十八日祭壩以來投文過關之船一千八百餘隻計過壩米方一十四萬四千八百五十六石七斗三升五合職廳舟行務關以上僱

催毋剝糧船備查衛所自府軍衛以後無接計
者聞濟寧開河以上河淺舟膠天津上下竟爾
脫幫近閱邸報見總督河道疏內有回空之遲
皆因剝運之遲等語夫舊歲冰結在十月終南
來毋船凍阻天津下者三千二百餘隻凍阻天
津上者五百九十六隻凍務關以內者六百六
隻該職水陸並運萬分拮据剝運俱就露回回
空未逾

欽限今不咎過淮之緩而遙度剝運之遲職奚以堪

今歲遇閏河凍必早倘天時已去凍糧又多無
論

國儲暴于曠野官旗苦于蚕食而陸運巡防起回
搬剥又大費區處矣須趁此天時和暖之時沿
河淺阻地方嚴督官夫極力挑濬務使河洪深
潤船隻通行仍禁官旗不許停泊盜賣貿易則
船行速而運務易完職廳終夜熟籌計無所出
伏乞俯賜具題嚴督漕河衙門申飭郡邑有司
躬詣信地濬挖淺阻晝夜驅行明分殿最毋使

狡猾官旗耽時日等因到部奉批該司查
速行具題奉此擬題間又奉本部送戶科抄出
應天巡撫曹文衡題爲恭報漕糧兌完事八月
十六日奉

聖旨漕糧舊制十二月兌完開幫這七月方報兌完
據稱回空到遲如何不依漕規叅奏提問及船已
到齊交兌仍後有司違玩可知上海縣着從重議
處龍江衛領運官巡漕御史提究今秋期踰半重
運抵灣無期該部速差人查首幫何處尾幫何處

具疏回奏漕運督按衙門差官沿途星速催償如
有淺阻誤運卽查該管河道部廳信地叅處不得
容徇該衙門知道欽此欽遵卽行坐糧廳備查重
運船糧去後續據郎中丁流芳回稱稞米到者
首幫自鎮南等衛運官倪希賢等共三十三萬
五千八百九十餘石粟米到者首幫自淮安等
衛運官劉元勳等共四十二萬四千四百九十
餘石內除昌密二鎮稞米一萬九千二百三十
餘石粟米二十四萬三千七百餘石聽乞運廳

撥發船剝運外計已報到京通糧粳米三

一萬六千六百六十餘石粟米一十八萬七百
九十餘石共種粟米四十九萬七千四百六十
石七斗四升自七月十八日祭壩起至八月十
二日止實進京通倉米一十四萬四千八百五
十六石七斗三升五合已經具文呈報今自八
月十三日起至十七日止又進京通倉米七萬
七千八百七石淨未過壩米二十七萬四千七
百九十七石五合等因准此遵卽呈堂一面

人行查并賞文赴總漕巡漕漕儲道坐糧廳及沿途各該衙門速催糧船星馳前進仍查尾幫何處以便另疏 奏報擬合先行題請申飭案呈到部該臣等看得漕糧爲軍

國大計億萬軍民咸倚命焉查議單開載每年漕糧俱限十月開倉十二月終兌完開幫河渠事宜悉聽先期料理以待糧運仍將兌完過淮過洪各日期船糧細數

奏報如有司米不完軍衛船隻不備並不及時修

築疏濬一體參究降罰有差煌煌單例各當遵
守夫何法弛人玩以致節年守凍去冬獨多起
回盤剝大費調停屢奉

明旨注意漕儲申飭責成炳若日星蓋欲舍舊而圖
新挽遲而得速也迺回空之漕艘猶稽飛輓之
濡滯難免今歲河南山東報四月內兌完江西
湖廣報五月內兌完江南蘇松應安等九府直
至七月十五日始報兌完而浙江一省因請海
寧改折未荷

且至今無開幫之報矣程之六月過淮之限豈不大愆期會哉今查已到壩稷粟米約可五十萬石內已入京通倉米約可二十二萬二千六百餘石逆計將來視客歲凍糧至二百四十餘萬者差爲勝之然聞河淺舟膠幫次多不接續論者皆謂今歲凍糧仍當在百萬上則猶大可慮也一守凍起回而蚕食益賣虧損良多弊乃不可勝言矣

皇上惻然動念責令臣部速查首幫尾幫各在何處

夫各倉自七月十八日祭壩則首幫之至已
餘矣獨是尾幫未知近抵何處已經差官沿途
詢問并移咨總漕衙門蓋舊例具題過淮過洪
蓋以尾幫爲據今俱未至是知尾幫之尚遙也
總之屢奉

明旨告誡司漕諸臣似已備加竭蹶無奈回空之愆
期也臨兌之無米也河流之苦旱而淺阻也則
天時人事又有出于常理之外者但視客歲似
爲差早所可仰副

至懷者此耳惟是仲秋將盡天寒可虞目前之計惟有催僱速行一著而催僱之法惟有趕船濬淺二事若循催趕之虛名船終逗遛不前必責成州縣正印官同管河官親詣河干晝夜督催程挨一程境接一境巡漕御史置設文簿發各州縣限立時刻入境有報出境有報一有遲悞瞭然可查河官提究印官叅處如是則船無停泊誰敢貿易人無所容其推諉而後風帆可望飛渡矣如習挑濬之故事船終膠滯不行必責成

沿河司道轉責河廳及州縣正官凡淤淺處所
親督夫役竭力疏濬無用老幼充數徒以文具
塞責仍查挑入水深幾何挑出泥堆幾何刻期
而督限日而完凡有阻滯坐致稽遲照依漕規
從重叅處如是則船旣通行誰敢藉口人有所
用其實力而後舳艫可望鱗集也揀已往之緩
以爲目前之急挽開兌之遲而爲運行之捷無
便此者矣但使河干減得一石凍糧便令太倉
增得一石美粒豈曰小補之哉旣經該司具呈

前來相應題

請申飭恭候

命下臣部行文總漕總河工部都察院轉行倉漕等
各衙門一體欽遵施行

崇禎二年八月二十三日具

題本月二十五日奉

聖旨據奏漕糧前幫雖已抵壩入倉後運不接開河
水淺舟膠轉眼冬寒凍阻可慮地方官開兌踰期
已屬遲玩乃河道部廳各官所幹何事額設挑濬

錢糧撈淺夫役作何支銷全無疏濬致河身淤
好生曠職悞事見今淺阻何處該管何官總河
若星速查職名奏來着戴罪星夜設法撈濬仍
成該道督率州縣正官挨程催僨入境出境按
開報如或懈緩悞運有司叅處管河官革職提
不得冀望寬政尚以空文塞責天津以上剝運水
淺也著經管部廳速行撈濬巡漕御史漕儲道嚴
催尾幫前進各不得違慢取罪該衙門知道欽此

題差監兌主事丁自初等疏

題爲漕事敝壞莫支振靡挽頽宜亟謹申舊章陳
一得以破積習以裨

國計事雲南清吏司案呈奉本部送戶科抄出江
西監兌本部陝西清吏司主事林玄題稱前事
等因奉

聖旨知道了接差監兌官作速具題俱限十一月到
任料理新運開兌事宜該部知道欽此欽遵抄出
到部送司案查舊例每年題差司屬官五員前

去浙江江西湖廣蘇松常鎮山東河南各水
監兌漕糧及查催見徵帶徵各項錢糧萬曆
十七等年因爲省官省費遂議裁革至崇禎元
年十二月內該巡倉御史宋師襄題爲前事條
議清政七款隨奉

聖旨監兌官查條

祖制仍與題復以專責成欽此該本部查照節年準
例斟酌時宜題復監兌以飭新運仍臚列五議
以補未盡事宜一曰酌定差員查得本部舊法

原設監兌官五員蘇松浙江江西湖廣各一員
山東河南共一員蘇松等四處漕糧旣移水程
亦遙差官監督以速兌運誠無煩再計矣惟是
山東河南所運原止粟米數不甚多年來依限
輸將亦未凍阻似於江南省直事體微意當此
民貧財盡之日仍宜斟酌劑量其間山東漕米
兌於德州河南漕米兌於小灘及查德州臨清
俱原設有管倉主事可以就便管理合無將山
東監兌併入德州倉兼管河南監兌併入臨清

倉兼管各加

勅書一道查照議單協同糧道料理至於蘇松浙
江西湖廣俱照舊例差用庶漕務不致廢弛而
糜費亦少節矣二曰申明職掌監兌一差專爲
漕糧而設初督州縣開徵則宜修復水次倉廩
俾令米盡入倉務以乾圓潔淨爲主次督旗甲
開兌則宜盡除綱私誥會及勒耗折乾等弊務
以兩平交兌爲主兌完之後俾令刻期開幫尾
押前進直至瓜儀過淮而止沿途查點漕艘毋

令攬前落後裝載私貨延挨時月若夫

內供白糧亦令緊接漕幫絡繹前進把總運官仍
須分別殿最揭報勸懲則監兌之職業盡矣若
應安六府漕糧監兌於上江御史淮揚四府漕
糧監兌於巡鹽御史向來成例具在遵行有年
惟是法久人玩未見着實舉行所當一併申飭
者也三曰兼催折色省直漕糧之外有漕折輕
賚銀皆與漕糧相關涉者此外一切金花

內供顏料蠟茶布絹等項并京邊舊餉稅糧馬草

正雜新餉錢糧監兌各官俱宜祗奉部檄加意督催本部近例春月外解缺乏每年差官守催而各省直多以冷眼視之或令借屋而貸炊爨類緣門而持鉢守候無聊輒歸鄉里逋金欠額追報無期今監兌旣設則該省直守催從茲可省監兌旣兼守催之事必須移文飛檄事事留心一年滿日分別完欠見徵務完十分帶徵務完二分如有拖欠一體查叅且蘇松浙江皆財賦輿區年來刑敝相仍疾呼不應雖奉

明旨責成於撫按司道而監兌

舊制原有督催查叅之例尤難廢格至德州倉之於山東臨清倉之於河南亦照此例行之惟淮揚應安等處折色道里紆迴文移往返旣不便責之蘇松監兌又不可不擇人督催則淮揚四府委之淮安倉差應安六府委之九江關差俾令照例督催完報亦便計也四曰崇重事權監兌司官以含香之清署膺皇華之特遣其責任亦隆重矣無奈邇來法紀凌夷部使體統且漸輕

漸藪也啣

命以往操

功令以從事而有司或以贅員視之其何以展布
四體耶是必查照舊例請給

勅書關防各府正官以下相見之禮查照卹刑儀節
無得分庭相抗至於衙宇使令供億等項昔年
俱有規制簡查原案逐一修復在司官不妨厚
自挹損在地方不得過爲菲薄其要尤在撫按
司道各從

國儲起見協裏相成刮目相待庶不致委

君命於草莽而軍儲

國計胥有裨益矣五日滌除陋規人臣設官分職
總期展采宣猷况監允一差已設而復裁旣裁
而又復其故可思也裁者因前官之敗羣徒濫
染而負氣復者望新官之砥礪務拮据而奏功
故戒前車而策後効亦在各官之自爲計耳聞
往日監允濫受州縣有司交際等幣帛下程心
紅紙劄之類一槩勿辭而不才有司又轉取之

大戶糧長頭會箕斂剝肌椎髓卽有不收多
有司囊橐其庸闇監允又有縱容下役恣爲殘
削而弗問者叢怨讟而騰蜚語職此之繇矣夫
惟廉生威有慾無剛自古記之奈何耽小利而
昧大計乎以後各官巡歷地方首禁有司餽遺
一槩謝絕以澹泊廉靜爲根基以樽節愛養爲
作用勿耽逐於世味勿艷慕於俗情斯

君命乃可以不辱而前途自見其遠到周歲差滿照
例考覈稱職有優擢無仄任事者之苦心不稱

職有明罰無資貪惰者之巧計則人爭自淬勵
以共副任使矣等因題奉

聖旨監兌新復規條宜飭這條議各欵俱依議仍著
爲功令盡一遵行預裨漕政以裕國計該衙門知
道欽此通行訖今照崇禎三年起運二年分漕糧
監兌官員相應題差案呈到部該臣等看得監
兌一差關係最重當漕事敝壞之極值軍民頽
鈍之久非力爲振刷不能起敝維新非早爲整
頓不能挽遲爲速今歲監兌四臣題請

命下在正月而履任催餼在三四月遂致緩不及事
雖竭蹶圖維而弗克攸濟今奉

明旨限十一月到任亟當題差速往料理查得本部

山東司員外郎張朝綱福建司員外郎高鏞貴
州司主事王繼康四川司主事丁自勸四員俱

各諸練勤敏堪以差委前往浙江江西湖廣蘇
松常鎮各水次監兌漕糧并督催各項是徵帶
徵起運錢糧其山東河南仍照舊議併入德州
臨清倉主事就便管理一體行事內德州倉主

事徐天鳳業已報滿見今另題陝西司主事焦
覲祖管理倉務兼委監兌其應安六府漕糧仍
照舊例聽上江御史淮揚四府漕糧兩淮巡鹽
御史綜理至于折色錢糧在淮揚四府委淮安
倉差應安六府委九江關差各照例督催完報
恭候

命下臣部行令各官查照後開地方各請

勅書一道分投前去限十一月中旬各到地方會同
各該巡按與巡鹽御史查照議單開載及節年

題

准事理併新題五議先將該年分應兌正耗本折漕糧及輕賚銀兩運軍行月糧銀設法督催盡數完報仍將已到地方開倉開兌開幫日期及覓運各官賢否諮訪的確報部及該科巡倉查考如軍衛有司怠玩悞運及抗法撓阻應叅奏者會本叅奏應拏問者徑自拏問其漕糧務期乾圓潔淨禁絕話會勒耗折乾等弊兌完之後卽令刻期開幫尾押前進直至瓜儀過淮而止沿

途查點漕艘毋令裝載私貨仍各會同撫按嚴
督所屬州縣將一切金花

內供顏料蠟茶布絹等項并京邊舊餉稅糧馬草
正雜新餉錢糧逐一查明見徵者務要全完帶
徵者限完二分已徵在官者星速起解已解未
獲批單者嚴拘家屬監併完放侵欺花費者拏
問叅奏變產抵補一年差滿通計完欠照例叅
罰一面候接管官至日交代明白照限回京復

命聽本部考覈蘇松常鎮湖廣江西浙江限三箇月

到部如各官在道回家致違限期及寬縱正官
止叅卑職塞責者聽本部與科道指名查叅罰
治又各官應用勘合移咨兵部查給其差人賈
奏火牌每年蘇松常鎮江西湖廣浙江各給六
面山東河南各給二面至於江南係巡視上江
江北係兩淮巡鹽各御史兼管及兩浙巡鹽御
史兼理兌務俱聽都察院具題請給

勅諭其蘇松常鎮浙江江西湖廣山東河南巡按御

史各請監兌

勅書一道與監兌部臣順賫交付以便一切題奏事
宜會同行事又各處起運京邊錢糧完欠數目
監兌官復

命查叅題抄到部照例候發差官年終將各州縣完
完續完未完各總督完及幾分以上磨算明確
開坐呈部以憑分別核撥

請如有司朦朧捏報監兌總數未明或指少抵多或
以欠作完者一體察治

計開

蘇松常鎮水次一員四川清吏司主事丁自

勸

浙江水次一員山東清吏司員外郎張朝綱

江西水次一員福建清吏司員外郎高鏘

湖廣水次一員貴州清吏司主事王繼康

山東水次一員陝西清吏司主事焦觀祖管

理德州倉兼管兌務

河南水次一員浙江清吏司主事鄭廷楫見

管臨清倉照舊兼理兌務

崇禎二年九月初九日具

題本月十三日奉

聖旨是着速領勅前去欽此

議放十月官軍月糧疏

題爲議放官軍月糧事雲南清吏司案呈本年九月十一日准下糧廳付稱照得十月分官軍月糧京通本折稷粟未經付定難以坐派相應移會爲此合付貴司煩將十月分月糧作速定奪移付過廳以便坐派施行等因到司准此查得每年十月分月糧

祖制給放折色合應劄行太倉銀庫預爲措處庶于各軍折色月糧不致愆期第恐太倉無銀改給

本色本司未敢擅定今准下糧廳付稱十月分
官軍月糧京通本折尚未定奪難以坐派伏乞
批示以便移付下糧廳坐勘施行等因呈奉堂
批本部受事年餘已放米折三月矣目今庫內
無銀恐難再放折色米價方貴姑以粟米代之
何如該司查議具題俟至明年按月給折以示
齊一奉此爲照案查每年四十兩月例放折色
後因太倉空匱屢改放期故于去年十一月間
補放去年四月分折色而今歲四月分所放之

銀係補去年十月分者其四月分應放之銀那
至七月始給若非本部念切京庾匱乏爲

國深慮苦心調劑則三月米折決不能按數補給
矣今十月分例應給放折色無奈外解中斷庫
內無銀委宜暫改本色然事係通融恐起紛囂
合應題

請以便坐派案呈到部該臣等看得京軍月糧業奉
明旨給放月不過五遵行已久及查四十兩月舊例
支放折色則目下十月其期也然而錢糧不敷

太倉如洗欲俟外解給發誠恐軍士枵腹而難
於待卽欲改給本色又慮京庾匱乏而不敢出
再四躊躇扼腕無策且臣待罪年餘已放折色
三月則放折之愆期非臣任內事也惟是期會
屢改終非畫一之規有不得不從長酌議者再
查京倉每年例支粟米一月其餘皆支粳米良
以粟米之價廉於粳米非其時而給之不任受
也以故粟米積於有餘第

京師此時米價頗騰而折色每石五錢其價仍在

粟米之下則以粟米而代折色無不可者臣等
熟籌其便計惟改放京倉粟米以抵應放折色
在官軍以應折之月而獲本色靡不樂從在倉
庾以因陳之粟而抵折色亦免紅腐此真公私
兩便之策也俟至來歲仍照四十兩月放折永
爲定例則酌濟得宜而紛紜可免矣既經該司
案呈前來相應題

請恭候

命下臣部行文督部等衙門一體欽遵施行

崇禎二年九月十六日具

題本月十九日奉

聖旨是欽此

覆主事陳振豪條議漕運疏

題爲漕運日遲民生日困纂修全書非屬緩圖茲
後懲前尤有先務一得之愚謹披瀝以效涓埃
事雲南清吏司案呈本月初九日奉本部送戶
科抄出刑部山東清吏司添註主事陳振豪題
稱前事等因奉

聖旨這奏有裨漕務民隱該部卽詳議具覆監兌申
明職掌差回考覈稱職奏請復任在差不許陞轉
該衙門知道欽此欽遵抄出到部送司查得刑部

陳主事條議九款俱有裨於漕務民隱相應請
議具覆案呈到部該臣等看得東南爲

國家財賦之藪而漕糧係軍民命脉之源是以舉
例十月開倉十二月兌完三月過淮六月京倉
完納一有違限有司軍衛一槩罰治載在議集
不可違也惟法久易弛人習成玩遲之又遲至
屢次守凍而不可挽回年復一年至今日力催
而猶難收拾凡懷經

國之心皆抱深長之慮然不從其源頭處洗刷

則不能振人心之靡不從其根蒂處斬削之則
不能去漕糧之蠹此蠹不起於蓮妖而祟不跡
於水旱也皆因有司不經畫於心而吏胥得播
弄其手虎噬狼貪蒼赤受害鼠窟狐穴鬼神莫
測遂將小民脂膏盡填無窮之壑致使京邊泉
府半入巨奸之囊是必良有司奮起精神極力
剔釐又必新監兌實盡職守刻意振刷庶幾耗
蠹盡清漕事有濟主事陳振豪產於其地熟知
竅要又久於其鄉洞見弊源故固賦役全書而

條陳漕政不啻見垣一方真如因病下藥所種
漕務民隱非淺鮮也臣謹按款臚列詳議具覆
恭候

命下臣部移咨各省直撫按轉行各該司府州縣及
劄各監兌司官一體欽遵施行

計開

一會計頒示宜明

前件看得條鞭銀米歲有定額原宜曉然
與海內共知者先是州縣倉口派額流動

增減不一以致文移往返耽延上下停閣
多有坐單未發而先自開徵巧設約計名
色而恣意加派者臣部痛懲此弊業于崇
禎元年正月題議悉除流動增減名色第
較數歲之中以爲常酌派定額刊成會冊
倉口清單每于甲年六月之初卽將乙年
清單預行題發令各州縣照額徵輸永爲
畫一通行在案不意猶有無錫縣吏胥隱
匿部文多派至四五千兩者此輩不加重

懲

功令空懸其飛而食人者如故是非會計不早頒
實錄有司不奉行也今後宜令省直司府
賁成州縣查照清單刊榜曉示仍將出示
日期緣繇轉報臣部庶百姓知額辦之確
數而積猾免分外之敲琢矣伏候

聖裁

一清繇之舊規宜復

前件看得 國家

錄小票備載州縣本年丁田銀米之數
顆粒無所容其增減毫釐無所任其盈縮
法至簡至明也自吏胥惡其害已停閣不
發遂得任意洒派而小民無處可問今會
計冊已定何難修復

舊制誠於開徵之先每戶預給清錄一張不必家諭
戶曉自是條分縷析奸猾巧計靡施既免
飛派花分之弊愚氓洞見不爽自無茹毒
飲苦之虞不則額編紙銀安所用之廉明

有司决不混淆乃爾伏候

聖裁

一 鬼名之支吾宜核

前件看得人戶以籍爲定糧米以戶爲科
徵收者照冊均派輸將者隨戶納完事極
直截法易追比無奈奸宄吏胥乘機作弊
殷實人戶隱匿以侵收入已假立鬼名倩
借以責比瞞官及至兌軍之時陽爲出票
陰爲賄差以紙上之鬼名多方支吾以差

人之詭計百端延捱迨於開幫事急輒振
大戶姑從借兌以了欺誑之局此弊相沿
匪朝伊夕是必撫按檄之司道司道責之
有司按冊查名按名派糧逐戶磨對逐人
追比則人卽奸險無所施其出沒變幻之
術名旣責實自有便於漕輓

國儲之計矣伏候

聖裁

一發兌之總撤宜查

前件看得通縣之糧必有總撤而總撤之數必有文冊總書造冊有司印鈐多寡洞若觀火前後定如列眉軍船隨其所到自可依次兌發惟有司漫不經心斯奸胥得以作弊零星票發分總無憑那移可以出入其手更換可以低昂於心此奸之府而害之源也是必責成有司先期責令戶書攢造總冊待兌糧時親自查勘以戶甲合圖以圖區合縣總如其撤撤如其總則顯

粒悉明吏胥無乾沒之弊點發至便兌軍
無守候之虞矣伏候

聖裁

一糧長候管收之制宜復

前件看得三吳設立糧長五年編審一次
掌管本戶本甲之糧輸管應收應解之事
其服役甚大而支持頗難然有鄉紳公議
津貼食米每石自三升以至五七升不等
爲力已易責將何諉惟是糧長不潔已以

急公而徇私以自利有便于已者自行
充有不便于已者別立併充之名賄通管
糧佐貳零星追比甚至以私租私債各役
工食混槩牽入是以糧無完期民無寧宇
今惟督令有司照舊專責糧長管收管解
非五十石以上者不許盡允革去零星併
兌之法則州縣之追比自密而奸猾之影
射潛消漕糧風帆可渡小民雞犬皆寧誠
官民兩利之策也伏候

五裁

一歸倉比較之法當嚴

前件看得議單開載各處徵收勢豪大戶
敢有不行運赴官倉逼軍私兌者比照不
納秋糧事例問擬如掌印管糧官不卽申
達區處縱容遲悞提問罰治每年俱限十
月開倉十二月終兌完開幫何廢弛至今
倉廩坍塌已越數年矣或大戶待兌於水
次或糧長半收於私家或小戶報完於紙

上糧米入倉十無二三又何怪臨允之無
米也相應查議舊例每年八月責令糧長
卽將倉廩預行修理防其上漏下濕掌印
同管糧官親驗如法及時徵收分區輪比
則修理經費不爲吏胥賄賂之資而預備
漕米可無糧船耽誤之慮矣伏候

聖裁

一存留之本色宜折

前件看得糧米有存留一項與漕白二糧

事不同科徵實一體此本地爲養贍孤貧而設者也昔年各處原皆歸倉官支官放上無屯膏下有實惠自改撥糧長而得多寡其手矣又改撥鄉紳大戶而多不按時按數給發矣此以

朝廷恤貧之意而爲諸人朘削之媒也夫法窮則變固不得膠柱以鼓瑟變貴宜民又何可因噎以廢食若曰改折五錢其價旣廉又多拖欠孤貧愈無控告矣莫若仍照舊例徵

收歸倉漸復昔年官支官放之舊此於孤
貧最便而於

國計無損誠不必輕變

成法頓起紛紜之端也伏候

聖裁

一積蠹之究治當嚴

前件看得三吳民害最苦積蠹以彼城狐
社鼠神出鬼沒非有察淵照膽之精明不
能燭其弊非有電迅霆擊之風力不能拔

其根蓋緣其人習知州縣錢糧之數或名縣總或名總書州縣錢糧一手握定衙門慣積皆聽役使卽經前官問革後復更名竄入每遇倉點之際鑽情行賄一切費用皆預借於漕糧而取給於花戶每石止折銀四五錢本人利其自便拱手與之多則千餘少則數百以致臨兌之時倉廩無米拘提大戶責令立完夾打枷號身家盡傾及至兌後升合無還似此天日蔽黑人神

共憤與夫會計之不早清繇之不發皆此輩爲祟也合無請

勅撫按道府責成有司盡法究革間或訪拿重治另擇小心奉公之人申送上司從公點用則奸宄潛消民生有更甦之日狐鼠遠遁

國儲無耗蠹之端矣伏候

聖裁

一 監兌之職守宜明

前件看得漕糧重務特設監兌以董其事

議單開載甚明職掌甚重有司不得視爲
贅疣敢於延緩部臣不得視爲傳舍急於
弛擔舊例先期臨倉查驗糧米有無完貯
必米色乾潔數無短少約束軍民平斛交
兌兌完開幫此

國儲之倚賴匪輕也後因沿習日久視爲故事每
到一縣不過臨倉點名取討完冊漕糧之
完欠米色之高下漫不經心此當寧所爲
議革耳今

聖上注念漕事遵例復差有不感激策奮者非夫也
為監允者必仰遵

勅書一應職守着實舉行勿憚跋涉勿事虛文親臨
倉口查驗米色有不乾潔者即加晒揚有
不完運者即加督催必期京儲盡數報完
又當申明差回考覈如果稱職奏

請復任不許在差陞轉以誤貯務此於漕政大有裨
益者也伏候

聖裁

崇禎二年九月三十日具

題十月初三日奉

聖旨各欵既詳議有裨各與飭行會計遲延清繇隱
匿二弊大爲民害著撫按官嚴加查覈務於徵收
前頒發州縣襲弊長行的卽行叅處該衙門知道
欽此